

## **Rodas dil destin** (1974)

da Gion Deplazes

Luisa che senumnavava Lucky veva spitgau sis liungs meins tochen ch'ei fuvava finalmein schi lunsch. Oz stueva el neu, igl auto niev. Quei in da camifò. In da sport, s'entellir. A casa ha ella in bi migliac prospects en culur, in pli bi che l'auter. Il pli grev ei gleiti da saver tgei ch'ins vul. Mo ella crei ch'ella sappi oz tgei ch'ella vegli.

In um giuven, vestgius sco ord ina scatla, retscheiva ella all'intrada dalla vasta halla d'exposiziun. Cheu stattan ils bials dils bials en retscha, tarlischond sco rubins e smaragds, opals e safirs gigants. Ina bellezza, ina tarlischur da crom.

Il giuven vendider sa tgei ch'ella vul, quei sil fiat. El meina Lucky directamein als carrs che leventan il battacor. Cun vusch loma, bunamein sentimental-sacrala celebrescha el las qualitads ed ils avantatgs dad in carr suenter l'auter.

Tgei sforzs e tgei progress che la grond'industria dad autos, specialmein sias marcas, han fatg ils davos onns, quei ei strusch da crer. La davosa scienza e tecnica ei risguardada: tut per la segirezia ed il confort digl autist. Gnanc da far curvien che questas marcas e ch'ils davos models van giud clavella ch'ei pon strusch dar damogn da fabricar. Silmeins ei il diember che stat a disposiziun ad els limitauns, malgrad ch'els ein ina garascha gronda cun representanza generala. Secapescha che tuts accessoris che stattan el catalog ein avon maun, quei per in mudest prezi da surpli, naturalmein.

Lucky fa ina tschera da biutsch; ella ei dètg critica e malcartenta per ses vegn onns, para beinduras zun disfidonta e muossa cun damondas precisas, ch'ella capeschi enzatgei dad autos e lur tecnica. Quella viva sco ei para en in ambient da rodas ed ei sil current. Il vendider ei leds che sia platta da vendita ei alla fin. Quella ha el stuiu emprender ordadora per camond dil schef-vendider ch'ei adina zanuva damaneivel e teidla cun in'ureglia, tgei che cuora e passa. E paupra sch'el tralai ina part e lai mitschar la caschun. Ussa sa el tedlar sia clienta che muossa tgei che ella capescha. Cul tgau in smiul uiersch e fatscha tarlischonta teidla el cun devoziun, dat tgau e tgil e munchenta buca da reconuscher las stupentas enconuschientschas da l'otra part. Gie, el lai schizun passar senza sproposit e cunterattacca in laud sin marcas dalla concorrenza. Tgi che ha in carr da sport sco el, vegn dumandaus oz da quels che san enzatgei; lez ha è dapli dalla veta. Ins sa dir tgei ch'ins vul, en in carr en uorden ein ins enzatgi. Quei vala oz sco damaun. Quei perschuada. Per ina matta sco ella, giuvna ed independenta sco ella lai percorscher, bein il meglier dil meglier. Bugen vess el saviu, nua ch'ella lavuri e tgei paga. Tgi che fa pretensiuns e vul ver tut e pli che tut, quel quenta buc adina co pagar. Tier in pagament direct dat ei in rabat da tschun pertschien tochen la fin dil meins. Denton dat ei aunc outras modalitads da finanzas, secapescha arva il vendider aunc ina orva, per cass da tuts cass. El ei leds sco ina olma, enderschend che la cumpradra dispona sco ella lai percorscher dad in conto da banca. Ed alla damonda sco casuala, sur tgei banca ella vegli il pli bugen far la fatschenta, ad els seigi quei naturalmein tuttina, intervegn el era aunc quei.

Mond ella cabina da glas, il biro dils vendiders, per ils formulars da contract, entaupa el il capo-vendider cun tschera empau disfidonta.

„Sa quella tschahaia era pagar?“

„Sempla caussa, jeu sai indiar la banca. Ella duei esser solventa. In telefon fuss forsa il meglier. Fagei schi bien. Sco il solit.“

Il cau-vendider dat heighels cun in procurist dalla banca. Quei ei negin problem.

Denton ha il vendider supplicau Lucky ad in caffè, ina buontad bubronda che vegn survida alla bar visavi la cabina da biro dils vendiders. Il vendider lai seser Lucky cul dies cunter la cabina e semetta sez visavi, aschia ch'el ha contact visual cul cau-vendider che semetta gia al telefon.

Duront ch'il vendider emplenoscha ora cun scartira culonta las largias dil contract stampau, engarta el cheu siu schef tegn si ils dus dets desiderai. Cun curtesia tonscha el a Lucky il

contract, lezza suttascriva en hiroglifas saloppas. Denton quei tonscha. Il vendider stat en pei, gratulescha a Lucky per la buna cumpra e giavischa ad ella bia cletg, plascher e ventira cun siu auto ch'ella sa retscheiver gia damaun encunter sera, schigleiti ch'el ei prepara cunter la ruina e che tuttas formalitads ein O.K.

Lu complementescha el Lucky alla porta, engrazia aunc ina gada cun ina vusch sco pischada e seretra, envidond ina cigaretta, viers la cabina, spitgond il resun dil schef. Lucky ei ventireivla. „Co stat ei?“

„Bein e pli che bein. Tut en uorden“, fa l'auter cuort.

„In mument er'jeu buca perschuadius. Dieus seigi ludaus! Ins sa secuglienar.“

„Hai jeu è tertgau. Ella ha dacuort retschert ina considerabla summa dad ina segirada. Avon in miez onn ein mumma e sora sedisgraziadas mortalmein. Cun auto. Senza cuolpa. Il sbagli ei zanua auter.“